

HEBREOS

Maija'quëpi I Mamaquëja'a Capi

¹ Tsoe huë'ña Maija'quëpi mai aipëre ìte quëacaicohua'ijã'a ca mu'seña jaiye ca'aji'i, cui'ne jaiye tiñe pa'ye yo'oyeja'a ca'aji'i.

² Jaje ca'quëpi, yure tēji mu'seña maire ì mamaquëja'a capi. Si'a co'amaña ì ja're de'huasiquë ja're conì, si'aye co'amaña paja'quë ja're conì capi.

³ Jaë api, Maija'quë de'oyere pare miacaiquë. Cui'ne jaë api, Maija'quë pa'iyere maire ìñoquë ìje pa'i api, cui'ne jaëpi si'a co'amaña ì coca tutupi quëco paquërepa. Mai co'aye pa'ise'ere tsoa tonì, jeteyo'je Maija'quë ñu'ico ëja te'tena ja'rupi.

Huiñaohua'ire Jerepa Pa'i Api, Maija'quë Mamaquë

⁴ Huiñaohua'ire jerepa pa'i de'opi, Maija'quë mamaquëpi, ìohua'i paye jerepa pa'i mamire ìsi cuañosi do'ire.

⁵ Maija'quë ti cama'ë paji'i, te'ireje ì huiñaëre: Më'ë a'ë, yë'ë mamaquë.

Yure më'ëre huëoni pa'iyë ìsihuë.

Te'ireje ì huiñaëre cama'ë paji'i.

Yë'ë pasi'i, ì pëca ja'quë pa'ina,

Ìpi yë'ë mamaquë pa'ija'quë.

⁶ Jaje pa'iquëta'are iye yejana ì mamaquëre te'ire ìsiquë capi:

Si'a ì huiñaohua'i ìte do're ja'rujë ai de'oquëre papi cajë sihuajë'ë.

⁷ Maija'quëpi ì huiñaohua'i ayere capi, ñeje:

Huññaohua'ire cato tutuje pa'iohua'ire neñë,
cui'ne ye'ëre necaicohua'ini toaje pa'iohua'ire
neñë.

⁸ Jaje pa'iquëta'are i mamaquëre capi:

Ina, Diusu, më'ë cuañeñe cato, ti carajaiñe peoji,
më'ë cuañeñe cato nuñere pa'ë.

⁹ De'oyese'e oi, co'ayere më'ë ai cohuë.

Jaje pa'ina, Diusu, më'ëre, më'ë Diusupi ai
sihuayere isipi, më'ë cajeohua'ire isiye
jerepa.

¹⁰ Cui'ne yequeje capi:

Ina, iti huëo maca më'ëpi Ëjaë, yejare nehuë.

Cui'ne më'ëpi ma'tëmoje nehuë.

¹¹ Më'ë de'huase'e cato carajai ja'ñe a'ë. Jaje
pa'iquëta'are më'ë cato ti pani huesëja'quë
a'ë.

Si'aye ja cato co'a de'o huesë ja'ñe a'ë, ju'i caña
yo'oyeje.

¹² Jaje pa'ina, ja yejare cui'ne ma'tëmore më'ëpi ju'i
ca ñëoñeje pa'ye ñëoja'quë a'ë.

Cui'ne ju'i ca yeconi suñacaiyeje pa'ye më'ëpi
neja'quë a'ë.

Jaje pa'iquëta'are, më'ë cato jare ipi pa'ija'quë a'ë.

Më'ë pa'iyë ti carajaiñe paja'coa.

¹³ Diusu cama'ë paji'i, te'ireje huññaëre:

Ja'rujë'ë, yë'ë ëja te'tena,

më'ëre sañope yo'ocohua'ire më'ë quëo
huë'ehuëna të'ya me macaja'a.

¹⁴ Si'aohua'i huññaohua'i cato Maija'quëre
necaicohua'ipi joñoase'e pa'iyë, huasosicohua'i
pa'ija'cohua'ire coçaija'cohua'ire jëjo
daosicohua'ipi.

2

Ña Tayoye Pañu'u Huasosicohua'i Pa'iyere

¹ Jaje pa'ina, mai asasi cocare de'huarepa asacaijē pañu'u, hua saiye paja'cohua'i.

² Maija'quē cuañeñere huiñaohua'ipi quēase'e nuñerepa coca paji'i. Jaje pa'ina, iti de'oye sehuocaima'pē co'aye tayo yo'osicohua'i si'se cuañoahuë'ë, nuñerepa co'a do'ire.

³ Jaje pa'ito ¿mai me jēja'cohua'i a'ni, iye maire huasoye jaiyere ña tayosicohua'i pani? Iye huaso cocare mai Ējaēpi du'ru macarepa paire quēapi. Ja jeteyo'je i quēaye asasicohua'ipi nuñerepa coca'ë cajē asani maireje de quēahuë.

⁴ Cui'ne Maija'quēje i cocare pa'ë caquē iñoquē, pai yo'o ti'a ma'ñere jaiye yo'o iñopi, jaohuaija'a, i joyo tutu pai ñapere i yēyeje isisi tutupi yo'oquē.

Jesucristo Pajje Pa'i De'ose'e

⁵ Maija'quē huiñaohua'ina isima'ë paji'i, jaohua'ipi Ējaohua'i pa'ijē yequē mu'se pa'ija'a yeja, mai se cacore cuañejajē caquē.

⁶ Jaje pa'iquēta'are yequē hue'ña toyase'ena te'i quēaquē caji:

Ina, Diusu mē'ēpi ite huanēyema'ë cuasahuë.

Juni huesē capē hue'ere do'ire mē'ēpi ai co'a ju'i cocasi'i caquē yo'ohuë.

⁷ Jaje pa'ina, mē'ēpi ite huiñaohua'i huë'ehuë maca pa'ire nehuë, coa nēhui tēcahuë jaje pa'ijaquē caquē:

Jaje pa'isiquēta'are ite de'oyepi Ēja de'huani, si'aye mē'ë de'huase'e cuañequēre Ējaēre pare nehuë, mē'ēpi.

8 Si'aye i quëo huë'ehuëna të'ya meni saocaë'ë, mē'ëpi.

Jaje Maija'quëpi i quëo huë'ehuëna të'ya meni saopi, ti te'oreje hue'sena oañe papi. Jaje pa'iquëta'are mai ja yë'ta'a ñama'pë pa'iyë, si'a co'amaña ite de'oye sehuocaire.

9 Jaje pa'iquëta'are ñañë, Jesuni nëhui tēcahuë huiñaohua'i huë'ehuë maca pa'i pa'ijaquë caquë Maija'quë nesiquëni. Jaëni Diusupi maini oi si'aohua'i do'ire jucacaijaquë cuasa nëopi. Cuasa nëoëna, ai yo'oquë ju'isi do'ire yure de'oyepi ëja de'huasiquëpi si'aohua'ire jerepa pa'i pa'iji. Pa'ina, jaëni ñañë, mai.

10 Si'aye Maija'quë co'amañase'e pa'iji, ipi quëcoquëna. Jaje pa'ina, Maija'quë cato yëji, si'aohua'i i mamajëpi i de'o co'amañare conï payere. Jaje pa'ina, Jesucristoni johua'ire huasoquëni de'oquëre pare nepi, i ai yo'o do'ipi.

11 Jaje pa'ina, Jesucristo cui'ne i huasosicohua'i conï si'aohua'i te'ini pëca ja'quëre payë. Jaje pa'ina, Maija'quë mamaquë maire yo'jedohuë hue'yoye ca'rama'ë pa'iji.

12 Toyase'e jaje pa'ina, caji:

Më'ë pa'iyë ayere casi'i yë'ë yo'je tsire cui'ne jëjës'i, jai pai tsi'si sitona më'ëre sihuaquë.

13 Cui'ne caji, yequeje:

Maija'quëna yë'ë cato quëcosi'i.

Cui'ne tïjupë caji yequeje:

Iye macare pa'iyë, Maija'quë yë'ëre isisi mamajë ja're conï.

14 Ina isisi mamajë cato te'e capëre, cui'ne te'e tsiere hue'ecohua'i a'ë. Jaje cui'ne Jesuje paina ai de'oni te'e capë cui'ne te'e tsie hue'equë paj'i, pai

hue'eyere. Jaje pa'ipi juji'i, i ju'iñepi huati huani jeo tutu jiosi'i caquë.

¹⁵ Jioni ne huasopi, si'a mu'seña ju'iñere ca'ra do'ire tseá cuañosicohua'ije pa'iohua'i pa'isicohua'ire.

¹⁶ Jaje pa'ina, daima'ë paji'i, huiñaohua'ini coçasi'i caquë. I cato Abraham tsëcapëni coçaiyere caquë daji'i.

¹⁷ Ja coçaiyere caquë maije pa'irepa de'opi, Maija'quë ña hue'ñare pana, de'oyerepa Maija'quë aye yo'oye ñacai Ëjaëre papi, teaye ñani coçaiquëre papi, cui'ne i ai yo'osi do'ipi pai co'aye yo'oyere sai toçaiquërepa pasi'i caquë.

¹⁸ Jaje pa'ina, neña cuañoquë, ai yo'oquë asasiquëpi, yure maire coçai cuañoquë pa'ija'quë api, neña cuañojë ai yo'ocohua'ire.

3

Jesupi Moisés Seña Maca Pa'i

¹ Jaje pa'ina, Maija'quë do'ijë mësaru a'ë, Maija'quë pai acohua'i, i tsecohua'i pa'ijajë caquë soisicohua'i. Jaje pa'iye sëte Jesús Maija'quë jëjo daoquëse'ere, Maija'quëre sejë yo'oye de'oye ñacai ëjaëse'ere cuasajë pa'ijë'ë, Maija'quë pa'iji cuasaye necaiquëse'ere.

² Jaje pa'ina, Moisés si'aye Maija'quë huë'e ñacaiquë pa'i maca, de'oye Maija'quëre sehuoquë yo'o ti'acquë pa'iji. Jaje cui'ne Jesujë si'aye de'oye sehuoquë yo'o ti'api, iyere yo'ojaquë caquë Maija'quë sahuasiquëpi.

³ Jaje pa'iquëta'are Jesuni ai Ëjaëre pare ñajë sihuaye pa'iji, Moisésre sihuaye jerepa, huë'e nequë,

je'quë iti huë'e nesiquëpi ai sihua cuañoquë api, iti huë'e jerepa.

⁴ Jaje pa'ina, si'a huë'ña paï nese'epi pa'iji. Jaje pa'iquëta'are Diusu cato te'ipi si'aye nepi, mai ñajëna pa'iye.

⁵ Moisés cato de'oyerepa yo'o ti'acquë paji'i, ite necaiquë sëte, si'a Maija'quë huë'e ñacai. I necaiye cato paji'i, Maija'quë yeque mu'seña ca ja'ñere quëa iñoquë yo'oye.

⁶ Jaje pa'iquëta'are Cristo cato Maija'quë ma-maquë sëte, de'oyerepa i huë'e yo'o ti'acquë ñacai pa'iji. Ja huë'e cato mai a'ë. Maipi ite tuijë ocue pa'i macarepa mai uteyere sihuajë pa'ini.

Maija'quë Paï Pëa Huajë Ja'ñe

⁷ Jaje pa'ina, Maija'quë de'o joyopi caji, toy-ase'ena:

Yurepi, mësarü Maija'quë caye asasicohua'i pani,

⁸ Jëa joñoa nema'pë pa'ijë'ë, tsoe acohua'i Maija'quëre sañope cajë yo'ose'eje pa'ye.

Jeto cuëne yejana Maija'quëre neñasicohua'ijë pa'iohua'i pa'ima'pë.

⁹ Jarona mësarü aiohua'i yë'ëre neñahuë,

tsoe cuarenta ometëca yë'ë yo'oye ñasicohua'ita'a.

¹⁰ Jaje yo'ojëna, jaohua'ire ña jujani yë'ëpi pëi cahuë:

Ti yë'ë ye'yaye asaye coejë,

“si'anëpi yequese'e cuasajë cu'ijë”

¹¹ Jaje pa'ina, jaohua'ire yë'ëpi pëi ca nëohuë,

cacaye paja'cohua'i a'ë, yë'ë jare pëa huajë huë'ñana.

¹² Maija'quë do'ijë, jëa joyo co'acore hue'ema'pë cui'ne Maija'quë huajëquëre pare hua saima'pë

pa'ijë'ë, jare de'hua ñajë pa'ijë'ë, mësaru cuasayere.

¹³ Coa ai jerepa mu'seña ñape paï ñapere sa'ñe yëhuojë ca sëtöjë'ë ja yë'ta'a Maija'quë coca, iye mu'se caye tëtö saima'në. Jaje yo'ojë'ë, mësaru acohua'ipi co'ayere coso cuañoni sañope Maija'quëre cajë ne huesëye paja'cohua'ire.

¹⁴ Jaje pa'ina, Cristo payere i ja're conï paja'cohua'i a'ë canï ocue pa'i macarepa, mai du'ru macarepa asase'ena quëco pajë, jëoma'pë tuiye pa'iji.

¹⁵ Jare cuasajë pa'ijë'ë. Iyere ñeje caji: Yurepi mësaru Maija'quë caye asasicohua'i pani, Jëa coeye peoyerepa de'oye sehuojë pa'ijë'ë, tsoe acohua'i sañope cajë yo'ose'eje pa'ye peocohua'ipi.

¹⁶ ¿Ne pate'ni, Maija'quë yë'o asasicohua'ita'a jeteyo'je ite sañope cacohua'i de'osicohua'i? Jaohua'i cato si'aohua'i Moisés Egípto yejapi etosicohua'i paë'ë.

¹⁷ ¿Cui'ne ne ja're conï Maija'quë pëi paquë'ni, cuarenta ometëca? Maija'quë cato pëi paji'i, co'aye yo'osicohua'ini, cuene yejana juju tatasicohua'ini.

¹⁸ ¿Cui'ne neni Maija'quë ca nëou'ni, yë'ë pëa huajë hue'ña cacani huajëye peoji? Ja cato capi: Ite ire papi cuasama'pë sehuocaiye pasicohua'ini.

¹⁹ Jaje pa'ina, mai tiñarepa ñañë, jaohua'i caca ti'añe pase'e ite care paji cajë asacaiye pasi do'ire.

4

¹ Maija'quë pëa huajë hue'ñana cacaye ca nëose'e pa'iji. Jaje pa'ina, ca'rajë de'oyerepa

ñañu'u, mësaru acohua'ipi tsoe carajaji cajë ja pëa huajëyere t̄i'añe pama'cohua'ini cajë.

² Jaohua'ire huaso coca quëase'eje pa'ye cui'ne maire quëahuë. Jaje pa'iquëta'are jaohua'ipi Maija'quëre pa'ire paji cuasa t̄i'añe pañuë. Ja do'ire coçaiye papi, huaso coca asase'e.

³ Jaje pa'iquëta'are mai pa'iji cuasasicohua'i cato pëa huajë hue'ñana cacaja'cohua'ipi pa'iyë. Ja ayere Maija'quë ñeje ca nëopi:

Ja do'ire jaohua'ire, yë'ëpi pëi ca nëohuë,
cacaye paja'cohua'i a'ë, yë'ë pëa huajë hue'ñana.
Maija'quë cato iye yeja de'hua tējisi macapi pëa huajë huëopi.

⁴ Jaje pa'ina, yequë hue'ña toyase'e caji, ñeje siete mu'se ayere:

Diusu siete mu'se acona pëa huajëpi, si'a co'amaña ne tējini.

⁵ Toyase'e t̄ijupë ca coji:

Yë'ë pëa huajë hue'ñana cacaye paja'cohua'i a'ë.

⁶ Jaje cani caji, ja yë'ta'a yecohua'i cacaye pa'iji, pëa huajë hue'ñana caquë. Du'ru macarepa huaso coca asasicohua'i cato, iohua'i de'oye ite ire papi cuasama'pë sehuocaiye pa'si do'ire cacaye pañuë.

⁷ Jaje pa'ina, Maija'quëpi t̄ijupë yequë caca mu'se pa'ijaquë ca nëopi. Iye mu'se iti mu'se a'ë, caquë. Jaje pa'ina, Maija'quë maire caji, David tsoe hue'ña caquë pa'ise'ēja'a ja toyase'epi caji, ñeje:

Iye mu'se Maija'quë caye asasicohua'i pani jëa joñoa nema'pë de'oye sehuojë pa'ijë'ë.

⁸ Jaje pa'ina, Josuépi Israel pa'ire pëa huajëye isisiquë pa'ito Maija'quë t̄ijupë yequë mu'se pa'i ja'ñere caye pa'rapí.

⁹ Jaje pa'ito ja yè'ta'a pa'iji, Maija'quë pai cacani pëa huajë ja'ye.

¹⁰ Jaje pa'ina, Maija'quë pëa huajë hue'ñana cacaquë cato co'amañare ne tējini pëa huajësi'quë cacaji, Maija'quë co'amaña ne tējini pëa huajëse'eje pa'ye.

¹¹ Jaje pa'ina, mai tutu yo'oye pa'iji, jaro pëa huajë hue'ñana cacañu'u cajë, tsoe ja'në acohua'i Maija'quëre coca nuñere pa'ë cuasama'pë yo'ose'ena tuiye pañu'u.

¹² Maija'quë coca cato pa'iyë a'ë cui'ne tutu quë'ye a'ë, si'a tē'ña hua'ti niusicco jējēsēñe seña maca jējēsēñe a'ë. Jaje pa'yepi pa'ise'e cuasayë cui'ne mai joñoa sa'nahuërepa cuasayena jo timeñe a'ë. Jaje yo'oquë mai cuasayere cui'ne mai yo'oñu'u cuasayere tiña macare pana eto iñoñe a'ë, joyo cuasayere.

¹³ Jaje pa'ina, peoji, Maija'quë de'huase'epi ite catiye. Si'aye mai yo'oye tiña macare pare pa'iji, i ña hue'ñare. Jaje pa'ina, ina si'aohua'i yo'ose'e iñoja'quë a'ë.

Jesu Api, Maija'quë Huë'e Ñacaicohua'i Ējaërepa

¹⁴ Jesu api, Maija'quë mamaquë Maija'quë huë'e ñacaicohua'i Ējaërepa, mai mëñe quëco pajë pa'iquë. Jaëpi Maija'quë ña hue'ñare pare cacani pa'iji. Jaje pa'ina, mai ite ti'añu'u cajë yo'oyere jeoma'pë ocue pa'i macarepa yo'ojë pañu'u.

¹⁵ Maija'quë huë'e ñacai Ējaëre papi mai tutu peoye teayë ñani cocasipi, mai ai yo'oyeje pa'ye si'aye neñañe pa'ina, ai yo'oquë tēto saisiquëpi. Jaje pa'iquëta'are jaë cato co'aye ti yo'oma'ë paji'i.

¹⁶ Jaje pa'iyē sēte quēcojē tsiojañu'u, mairē oiquē Diusu ñu'i huē'ñana, ipi mairē teayē ñani oi cōcāija'quēre de'oyepi māi ai yo'o maca t̄i'aēna.

5

¹ Pai ñape Maija'quē huē'e ñacaicohua'i cato ěmēohua'i acohua'ini sahuani isicohua'ipi pa'iyē. Jaohua'i cato Maija'quē ña huē'ñare pana paire cacaija'cohua'ipi pa'iyē. Cui'ne pai co'aye yo'o do'ire Maija'quēna coa isijē cui'ne hua'ire ěojē secacaija'cohua'ipi.

² Ipi capē tutu peoye asaquēpi Maija'quē huē'e ñacaiquē cato huesēohua'ire cui'ne tayo saicohua'ire yo'o jujama'ē quēcoquē necaiye pa'iji.

³ Jaje pa'ina, i tutu peoquē tayoyere coquē cui'ne pai tayoyere caquē ěoquē señe pa'iji, sai de'hua cuañoñere caquē.

⁴ Jaje pa'ina, te'ije cuasaye peoji, yē'ē a'ē, Maija'quē huē'e ñacai ějaērepa. Maija'quēpi Aarónre nese'eje pa'ye soini ějaēre nesiquēre me jaje cuasaye'ni.

⁵ Jaje pa'ina, Cristore Maija'quēpi ějaēre nepi. I co'ye Maija'quē huē'e ñacai ějaē pasi'i cani ějaē de'oma'ē paji'i. Jaje pa'ina, Maija'quēpi capi, ñeje: Iye mu'se yē'ēpi mē'ēre pa'iyē isihuē, mē'ē a'ē, yē'ē mamaquē.

⁶ Yequēje caji, toyase'e ěte:

Mē'ē a'ē, Maija'quē huē'e ñacai ějaērepa pani huesēquērepa,
Melquisedecje pa'i.

⁷ Iye yeja Cristo pa'i maca ai teayē tutu caquē Maija'quēre seji'i, otare paque oi, Maija'quēpi juni huesēsicohua'ire huēo tutu paquēre asaquē. Jaje

seina, i de'oye sehuocai do'ire Maija'quëpi i seña asacaji'i.

⁸ Cristo Maija'quë mamaquëta'a i ai yo'oyeja'a ye'yepi, Maija'quëre de'oye sehuocaiye.

⁹ Jaje yo'oquë ti de'oquërepa de'oni, si'aohua'ire ite de'oye sehuocaicohua'ire ti pa'iyena huaso-quërepa de'opi.

¹⁰ De'ouna, Maija'quëpi ite i huë'e ñacai Ëjaëre pare nepi, Melquisedecje pa'ire.

¹¹ Jaiye iye ayere caye pa'iquëta'are airepa jëaji, me quëa ti'añe'ni, mësarupi asaye coeto.

¹² Tsoe mësaru yecohua'ire se ye'yacohua'irepa pati'ne pa'iohua'ipi ja yë'ta'a a'jiñe mañare Maija'quë coca du'ru ayere ye'yajëna, asacohua'i maña pa'iyë. Mësaru cui'naohua'ipi tutu peocohua'i maña co'i huesëni ojese'e ucucohua'i maña pa'iyë, tsoe jëayere ati'ne pa'iohua'ipi.

¹³ Jaje ojese'e ucujë pa'icohua'i cato tsitu'uje pa'iohua'i a'ë, ti co'aye cui'ne de'oye asa ti'ama'cohua'i a'ë.

¹⁴ Jëa ao cato aiohua'i aiñe a'ë, si'aye ta'ne co'aye cui'ne de'oye asacohua'irepa.

6

¹ Jaje pa'iyë sëte aiohua'i de'oyena ñese sañu'u, mai du'ru macarepa Cristo aye ye'yese'ere se oani. Cama'pë pañu'u ju'i hue'ñana sa co'amañare jëoconí pönëñere, cui'ne Maija'quë pa'iji cuasayere.

² Oco doye ye'yayere, sehuosicohua'i siopëana patojë secacaiyere, ju'isicohua'i huëiyere, cui'ne Maija'quë pai ñape yo'ose'e ña tëji ja'ne ayere.

³ Jaje yo'ojacohua'i pa'iyë, Maija'quëpi nuñerepa jaje yëë cocaito.

⁴ Te'erepa miañe ñani cui'ne Maija'quë de'o sëñe isiye asasicohua'ipi cui'ne Diosu joyo yo'oye asasicohua'ipi,

⁵ cui'ne Maija'quë coca de'oyerepa asasicohua'ipi, cui'ne yequë mu'seña pa'ija'a tutu asasicohua'ipi,

⁶ cui'naohua'ipi co'ye co'isicohua'i pani tijupë Maija'quëna ponë coñe peoji, tsoe iohua'ipi Maija'quë mamaquëni tijupë quejë yo'o do'ire. Me ponëñe'ni, si'aohua'i ña hue'ñana ite cue'cuejë yo'oni.

⁷ Jaje yo'ocohua'i cato yejaje pa'iohua'i a'ë. Ocoquëna, si'anë saquëyeje pa'iohua'i a'ë. Jaje pa'ina, ja yejapi iti yeja necohua'ini de'oye mëani quëcacaico pa'ito, Maija'quëpi iote de'oye ñacaija'quë api.

⁸ Jaje pa'iquëta'are yejapi de'oye quëcacaima'o co'ayere cui'ne miure quëico pani co'aye ca cuañojacoa. Jaje pa'ina, toapi si'aye ëo huesoye pa'iji, io mëase'e.

Utejë Pa'iyepi Qcue Pa'i Macarepa Paye

⁹ Jaje mësarute Maija'quë do'ijë mañare cajëta'a cuasayë mësaruru cato itire pare pa'iyë. Jaje cani cayë, nuñerepa huasosicohua'i pa'i ma'are pa'iyë cajë.

¹⁰ Jaje pa'ina, Maija'quë nuñerepa pa'ipi, mësaruru sehuosicohua'ire oijë cocaijë iñose'e, cui'ne mësaruru ja yë'ta'a yo'ojë pa'iyë huanëyema'ë pasipi.

¹¹ Jaje pa'ina, yëquë cato yëyë, mësaruru si'anë pai ñape jare jajese'e tëji hue'ñare pana de'oye

yo'ocohua'i pa'iyere. Jaje yo'ojë mësaru uteyere tiñarepa iñoja'cohua'i a'ë.

12 Coeyë, mësarupi josaohua'i ponëñë. Yëquë cato yëyë, mësarupi Maija'quë pa'iji cuasajë yo'o jujama'pë ocue pa'i macarepa tuicohua'ina ñajë iohua'i tuiyejë tuiyere. Maija'quë ca nëose'e paja'cohua'i yo'oyere yo'ojë'ë.

13 Abrahamre Maija'quë ca nëo maca ija'a co'ye ca nëo huesëpi, yecohua'i i jerepa pa'iohua'i peoye sëte. Jaje pa'ina, capi:

14 “Yë'ëpi më'ëre de'oye ñacaija'quë a'ë cui'ne jai pai pa'ija'cohua'i a'ë, më'ë tsëcapë acohua'i yë'ëpi necaina.”

15 Jaje caëna, Abraham quëcopi, jeoma'ë, utequë isi cuañopi, ite ca nëose'ere.

16 Paipi ca nëocohua'i pani iohua'i seña maca ëjaëna ca nëocohua'i a'ë, iohua'i ca nëose'epi care pase'e pa'ijaquë cajë cui'ne ja maca sañope caye carajaiñe pa'iji.

17 Jaje pa'ina, Maija'quëje i ca nëose'e paja'cohua'ina, i case'ere tiñe ponañe peoyerepa tiñarepa iñosi'i cuasani ti ca nëo huesopi, isire paja'quë a'ë caquë.

18 Jaje pa'ina, cayaye pa'iji, i ca nëose'ere ti yeque ponañe peoyerepa, cui'ne Maija'quëje cosoye peoyerepa. Japi maire sihuajë ocue pa'i macarepa pa'iyë isiji, ipi ñacaina, pa'iyë co'ejë i ca nëose'e utejë pa'isicohua'ire.

19 Ja uteyepi maire ocue pa'i macarepa cuasajë pa'iyë necaiji, jai yohuë dëquëcopi sëani jeo dëorena, te'e macare huahuayeje pa'ye. Jaje cui'ne mai joyoje Maija'quë huë'e sa'nahuë ta'tëpo jere

pana ja uteyepi se säasicopi pa'ico Jesús maire ma'a necai caca sitona.

²⁰ Jaje Jesús cacani ti Maija'quë huë'e ñacai Ējaërepa de'opi je'nëna iote pa'ija'quëpi, Melquisedecje pa'ipi.

7

Jesús Cato Melquisedecje Pa'i Api

¹ Iquë Melquisedec cato Salem paï ëjaë paji'i cui'ne Maija'quë ti ëjaërepa huë'e ñacai ëjaërepa paji'i. Jaje pa'ipi Abrahamre yequë paï ëjaohua'ire uihuaquë meñe quëconi co'iquëna, Melquisedecpi sañope ti'ani ite Maija'quëpi ñacaijaquë capi.

² Ja maca Abrahampi Maija'quë tsere Melquisedecna isipi, i uihuaquë nese'ere. Maija'quë tse cato si'a jëña pa'ye nesicohua'ipi te'ore Maija'quëna isiye a'ë, jare isipi. Melquisedec cani cayë “Nuñerepa yo'o ëjaë” cajë, Salem cayë cato cayë, “Jo'cua de'oye pa'iye” Jaje pa'ina, jo'cua de'oye pa'iye ëjaë cayë pa'iji, “Salem Ējaë” cani.

³ Pëca ja'quëre, ja'core, i co'ye aiohua'ire ite coasi mu'se cui'ne i ju'ise'e huesëyë, ti quëase'e peoji. Maija'quë mamaquëje pa'i api, Maija'quë huë'e ñacai ëjaë ti de'o huesësiquë api.

⁴ De'oji, yure ñajë'ë, Melquisedec cato ai ëjaërepa paji'i. Jaje pa'ina, mai ai Abrahampi paï ëjaohua'ire uihuaquë se jiose'ere Maija'quë tsere Melquisedecna isipi.

⁵ Jeteyo'je Moisés cuañese'e cato caji coa Leví tsëcapë acohua'ise'e Maija'quë huë'e ñacai ëjaohua'ise'e Maija'quë tse paye pa'iji, paï isi

co'amaña. Jaje pa'ina, jaohua'ise'e co'amaña secohua'i a'ë, iohua'ije pa'iohua'ini, Abraham tsëcapë acohua'ini.

⁶ Jaje pa'iquëta'are Melquisedec cato Leví tsëcapë peoquëta'are Abrahampi Maija'quë ca nëose'e paquëpi, Maija'quë tserë isipi, Melquisedecna. Isiquëna, Melquisedec de'oyerepa caca'aji'i, ite.

⁷ Jaje pa'ina, de'oye pa'i ja'ñe, cacaiquë api, jerepa pa'i. Iti ca cuãñoquë cato huë'ehuë maca pa'i api iye cayere sañope ca ti'añe peoji.

⁸ Maija'quë tserë coa isijëna, pacohua'i cato ju'licohua'i a'ë. Jaje pa'iquëta'are Melquisedecre cato toyase'e caji, ja yë'ta'a huajëquëre.

⁹⁻¹⁰ Jaje pa'ina, Melquisedecpi Abrahamre sañope sani ti'a maca cato ja jojoma'cohua'ipi, si'aohua'i Abraham pai pa'ija'cohua'ipi i capëre paë'ë. Jaje pa'ina, Abrahampi Melquisedecna saisi maca yure co'amaña secohua'ije si'aohua'i Leví tsëcapë acohua'ije si'a jëña neni te'ore Maija'quëna isiyere saihuë.

¹¹ Maija'quë huë'e ñacai ëjaohua'i levitas tsëcapë quëayeja'a Israel pai asahuë, cuãñese'e. Jaohua'i cato Aarón tsëcapë acohua'i paë'ë. Jaje pa'ina, yure jaohua'ipi cuãñese'e sehujë yo'ocohua'ini nuñe pa'icohua'ire necaicohua'i pa'ito, Melquisedecje pa'ipi daiye para'pi Aarón tsëcapë peoquëpi. Jaje pa'iquëta'are yure cato yequëpi daji'i, Maija'quë huë'e ñacai Ëjaë.

¹² Jaje pa'ina, Maija'quë ñacaiye yequëni neni cui'ne yeque cuãñese'eje ponañe paji'i.

¹³ Jaje pa'ina, mai Ëjaëni toyase'e caji, ñeje:

“Yequë Israel paì tsëcapë aquë api. Maija'quë huë'e ñacai ëjaohua'i de'oma' tsëcapë aquë api.”

14 Jaje pa'ina, Maija'quë huë'e ñacai ëjaohua'i pa'ì ja'ñe ca maca, Moisés ti cama'ë pa'isi tsëcapëja'a, mai Ëjaë cato daji'i, Judá tsëcapëja'a. Jaje yo'ose'ere si'aohua'i mai asayë.

15-16 Yureta'a paì cuañeñeja'a daima'quëpi, huajëquëpi daji'i, Maija'quë huë'e ñacai Ëjaëre papi, Melquisedecje pa'ipi, ì pa'iyë ti nejo tì'añe peo tuturepa paquëpi, iyepi maire ai tñarepa asa cuañoñe quëaji.

17 Jaje pa'ina, daisiquë ayere Maija'quë coca toyase'e caji, ñeje:

Më'ë a'ë, Maija'quë huë'e ñacai Ëjaërepa ti pani
huesëquërepa
Melquisedecje pa'i.

18 Jaje pa'iyë sète ja'në cuañese'ere tutu peoyere cui'ne cõcai ma'ñere cui'nare yo'o cõ ma'ñe ne huesopi.

19 Jaje pa'ina, Moisés cuañese'e cato nuñe pa'icohua'ire ne tì'a ma'ñe pa'iji, pa'ise'ere. Yure cato ai jerepa de'oyere payë, mai utejë pa'iyë. Japi Maija'quëna tsiojaiñe necaji'i, maire.

20 Jesure cato Maija'quëpi ca nëo huesopi. Jaje pa'iquëta'are yecohua'i Maija'quë huë'e ñacai ëjaohua'ire cato coa hue'yosicohua'i paë'ë, ti ca nëoñe peoye.

21 Jaje pa'ina, Ëjaëre cato ca nëo huesoquë capi, toyase'ena ñeje.

Ëjaë ca huesose'e ponëñe peoji.

Më'ë a'ë, yë'ë huë'e ñacai Ëjaërepa ti pani
huesëja'quë.

Melquisedecje pa'i.

22 Jaje pa'ina, Jesu api, iye huajë ca nëose'ere ti carajai ma'ñere de'oyerepa necaiquë, ja'në ca nëose'e seña maca de'oyerepa.

23 Jai paï paë'ë, yecohua'i Maija'quë huë'e ñacaicohua'i ju'ijë carajaicohua'i sête.

24 Jaje pa'iquëta'are Jesús cato ti ju'ima'quë sête Maija'quë huë'e ñacaiye yequëna se jëocaiye peoji.

25 Jaje pa'i do'ire Maija'quëna tsiojaicohua'ire, ti pani huesëja'cohua'ire huasoji. Cui'ne ti pani huesëquë sête jaohua'i pa'iyere caquë Diusure secacai pa'iji.

26 Jaje pa'ina, Jesús cato mai yësiquëre papi, Maija'quë huë'e ñacai Ëjaërepa. Jaë cato de'oquë api, ti co'aye peoquë api, cui'ne si'si te'ña mañaje peoquë api. Jaje pa'ipi co'aye yo'ocohua'ire tsioma'quë api. Jaje pa'ini ma'tëmo pa'iyere jerepa pa'ire nesiquë api.

27 Yecohua'i Maija'quë huë'e ñacai ëjaohua'i cato si'a mu'señapi nëicohua'ire huaijë, du'ru macarepa johua'i co'aye yo'o do'ire ëojë isijë Maija'quëre seni toni jeteyo'je paï co'aye yo'oyere ëojë isijë secacaicohua'i a'ë. Jaje pa'iquëta'are Jesús cato te'ere papi i capë ai yo'o do'ipi Maija'quëre isi tējipi.

28 Moisés cuañese'e cato hue'yopi, carajaicohua'ini Maija'quë huë'e ñacai ëjaohua'i pa'ija'cohua'ire. Jaje pa'iquëta'are cuañese'e jeteyo'je Maija'quë ca nëose'epi hue'yopi, Maija'quë huë'e ñacai Ëjaëre i mamaquëni, nuñerepa de'oquëni, ti pani huesëquëni.

8

*Jesupi Maija'quë Huajë Ca Nëose'ejã'a Cacaíquë
Api, Maire*

¹ Si'aye yëquë case'e ëjarepa iye a'ë. Payë, Maija'quë huë'e ñacai Ëjaëre pare, Maija'quë ñu'ico ëja te'tere ñu'ina, jeto ma'tëmöre.

² Pai nema' huë'ere pa'iji, iore pani, Maija'quë nesi huë'ere, jarote pa'i Maija'quë huë'e ñacai Ëjaë sëte, Maija'quë huë'e ñacai pa'iji.

³ Maija'quë huë'e ñacai ëjaohua'i cato, Maija'quëna isise'ere isijë, cui'ne nëicohua'ire huani ëojë seja'cohua'ini nesicohua'ipi pa'iyë. Jaje pa'ina, Jesucristoje i isi ja'ñe paye pa'iji.

⁴ Jaje pa'ina, ipi iye yejare pa'iquë pani Maija'quë huë'e ñacai Ëjaë de'oye para'pi, tsoe Moisés cuañese'eje pa'ye yo'ojë isicohua'ipi Maija'quë huë'e ñacaicohua'i jai pai pa'ito me pa'iquë'ni.

⁵ Iohua'i cato ca'nipi nesi huë'ena Maija'quë ayere necaicohua'i a'ë, ma'tëmo pa'iye ayere cuasajë yo'o co'amañapi, pai to'ouje pa'yepi. Jaje pa'ina, Moisés huë'ere ne huëo maca Maija'quëpi capi, ite: “Yë'ë më'ëre jeto ai cutihuë iñose'eje pa'iore nejë'ë.”

⁶ Jaje pa'iquëta'are mai Ëjaë Jesucristo Maija'quë huë'e ñacai Ëjaërepa cato, jaohua'i yo'ose'e seña maca de'oyere pare yo'oquë pa'iji, huajë cuasa nëose'ere. Ja huajë ca nëose'e cato, de'oyere pare isija'a co'amaña quë'ye a'ë. Ja'në ca nëose'e seña maca pa'ye a'ë.

⁷ Du'ru macarepa ca nëose'epi nuñerepa yo'oye pa'ito tijupë yeque ca nëoñe peora'pi.

⁸ Jaje pa'ina, Maija'quëpi nuñe yo'oma'cohua'ire paire ñani capi:

Yequë mu'seña Israel paire,
cui'ne Judá tsëcapëre huajëye yo'o ja'ñe ca nëoñe pa'ija'coa.

⁹ Jeto Egípto yejapi mësarü aipëre jëtëna tseani etoni sa maca,

ca nëose'ejë pa'ye ca nëoñe peosipi:
jaohua'ire cato yë'ë ca nëose'e de'oye sehuocaiye pa'si do'ire jeocohuë, caji, Ëjaëre papi.

¹⁰ Ja mu'seña tëto sai maca Israel paire yë'ë ca nëo ja'ñe iye a'ë caji, Ëjaërepa.

Iohua'i cuasa hue'ñana yë'ë cuañëñere tëocas'i,
cui'ne iohua'i joñoana toyasi'i,
ja maca yë'ë pa'ija'quë a'ë, iohua'i Diosu
cui'ne iohua'i pa'ija'cohua'i a'ë, yë'ë pai.

¹¹ Ja maca cato tsj mañaje cui'ne aiohua'ijë si'aohua'i yë'ë coca asacohua'ise'e pa'ija'cohua'i a'ë.

Jaje pa'ijëna, mai Ëjaë cocare asajë'ë, cajë yecohua'ipi cajeohua'ipi,

panita'a te'e tsëcapë acohua'ipi ye'yañu'u cajë yo'oye peosipi,

tsoe yë'ëre ire pani pai ñape asa do'ire.

¹² Cui'ne yë'ëpi iohua'i co'aye yo'ose'ere oni yejecani ti huañëyeja'quë a'ë,

cui'nare cuasa coñe peoyerepa.

¹³ Jaje pa'ina, huajëyere Maija'quëpi ca nëoni, du'ru ca nëose'ere ai co'amaña'ë caji. Jaje pa'ina, ai co'amaña cato peo hue'ña esa carajani huesë ja'ñe a'ë.

9

Iye Yeja Maija'quë Huë'e Cui'ne Ma'tëmo Huë'e

¹ Tsoe hue'ña Maija'quë ca nëose'e cato, iye yeja Maija'quë huë'ena Maija'quë sejë yo'o ja'ñe quë'ye paji'i.

² Ja ca'ni huë'e cato ñeje ne de'huasico paji'i, du'ru macarepa tu'rihuëre, de'o hue'ña hue'yo sitore toa tsëoni nëco saihuë, cui'ne Maija'quëre isisi ao, cui'ne mesa paji'i.

³ Cayaye acore capi tëhuosico je te'tere paji'i, yequë tu'rihuë ñeje hue'eco ai de'o hue'ñarepa.

⁴ Jarote paji'i, huëo së ma'ñare ëoco oropi de'o saihuë nesico cui'ne iti ca nëose'e de'hua mahuë, si'a te'ña oropi jasico paji'i. Cui'ne mahuë sa'nahuëre te'e oro ucu duruhuë paji'i. Iona ma'tëmopi tomesi aore ayasicopi paji'i. Cui'ne jarote paji'i, Aarón tse'equë pa'isi tupë. Jao cato cui'naopi huajëco de'oni joro quë'ico pa'isico paji'i, cui'ne quëna toñana ca nëose'ere toyase'ere ayasico paji'i.

⁵ Cui'ne ja mahuë ëmëje'ere pa'ë, huiñaohua'i capëa quë'iohua'ipi, Maija'quë pa'iye iñoja'cohua'ire nesicohua'ipi. Iohua'i capëapi mahuë sjo toto si'aore peo hue'ña pë'pëhuë, pai co'aye yo'ose'ere oni yeje hue'ñare. Ja ayere ai jerepa quëaye peoji, yure cato itise'e pa'ijaquë.

⁶ Jaje de'huasicona Maija'quë huë'e ñacaicohua'ipi si'anë jeoñe peoyerepa cacayë, du'ru tu'rihuëna Maija'quëre necaiye yo'ocohua'ipi.

⁷ Jaje pa'iquëta'are yeco seña maca tu'rihuë cato Maija'quë huë'e ñacaicohua'i ëjaëre pase'e cacaye

paji'i, te'e ometëcahuëre te'erepa. Cui'ne jaronã cacaquë pani saye pa'iji, nëicohua'i tsiere i co'aye yo'o do'ire saiquë, cui'ne pa'i co'aye yo'o do'ire saicasa'i caquë.

⁸ Iye yo'ose'aja'a, Maija'quë joyopi maire quëaji, ja yë'ta'a du'ru maca tu'rihuëna Maija'quëre seña pa'ito, Maija'quëre ca hue'ñare pana sai ma'api ja yë'ta'a hui'yoma'copi paji'i.

⁹ Si'aye iye yo'ose'e cato quëaji, iye mu'seña pa'icohua'ini. Jaje pa'ina, jaronã Maija'quëre isijë, cui'ne nëicohua'ire huaijë ëojë secohua'ire de'oye cuasaye ti necaiye pa'pi.

¹⁰ Ja yo'oye cato coa aõ aiñese'e, ucuyese'e cui'ne si'si cuya toñese'e ëmëje'ese'e cocaji'i. Jaje pa'ina, Maija'quë si'aye yeque pona macaja'a jaje yo'oye paji'i.

¹¹ Jaje pa'iquëta'are Cristo tsoe daji'i. Jaë api, Maija'quë huë'e ñacai Ejaërepa, si'a de'o co'amaña caraja'i ma'ñere paquërepa. I ñacai huë'e cato ai de'o huë'ere pa'ë, nuñerepa yo'o huë'e a'ë, pa'i nema' huë'e a'ë, iye yeja huë'ere caye pañë.

¹² Cristo Maija'quë huë'ena cacapi, i tsierëpa isisi'i caquë, cacama'ë paji'i, huequë tsiere, panita'a jo'ya ñama tsiere isisi'i caquë. Jaje pa'ina, te'erepa caca tējipi. Cacani maire ti'acaji'i, huaso cuañoni ti pani huesëyere.

¹³ Huequë ëmëohua'i tsie cui'ne jo'ya ñama ëmëohua'i tsie cui'ne huequë nomi ts'i tsie Maija'quëre isi hue'ñana ëosi huata tutu quë'ye paji'i. Jaje pa'ina, itipi co'aye yo'osicohua'ina tsoaru si'sire pecohua'i de'ocohua'ire ne tutu quë'ye pa'iji, ëmëje'ese'e.

14 Jaje pa'iyē sēte, je ja'yerepa Cristo tsie tutu paquē'ni! Maija'quē joyopi tī pani huesēquēpi yo'oquēna, ija'a co'ye Maija'quēna isiquē tī si'si tē'ña peoquēpi yo'ose'e. Jaje pa'ina, i tsiepi ju'iñena sayere mai cuasayere peo hue'ña tsoa tocaiji, Maija'quē huajēquēre pare de'oye necaijajē caquē.

15 Jesucristo api, huajēye ca nēose'ere yo'oquē, Maija'quē cajeohua'ire paire necaiquē. Jaje pa'ina, i ju'iñepi sai tocaji'i, ja'nē ca nēose'ere yo'ojē tayose'ere, Maija'quē soisicohua'ipi tī pa'yere i ca nēose'ere pajajē caquē.

16 Jaje pa'ina, i co'amaña huahueyere ca nēose'epi do'i quē'yerepa pa'ijaquē cani du'ru macarepa iti ca nēosiquēpi ju'isiquē api asayerepa pa'iji.

17 Iti cuasa nēosiquēpi ja yē'ta'a huajēquē pa'ito ca nēose'e do'i peoye pa'iji. Juquēna, do'i quē'ye paji'i.

18 Ja do'ire du'ru macarepa cuasa nēose'epi do'i quē'ye pa'ijaquē cajē tsie casose'epi, huēose'e a'ē.

19 Jaje pa'ina, Moisés si'aohua'ire quēapi, Israel paire cuañese'e cayere. Quēa tējini maja'i naña sēohuē nesicopi catē yoje pa'iona, hisopo tarana huēni huequē cui'ne jo'ya ñama tsiena ocopi co'mesiconā co co'i meni cuañese'e toya pēpēna tsiepi sa'cuapi, cui'ne paireje si'aohua'ire tsiepi sa'cuapi.

20 Jaje yo'oquē capi, jaohua'ire: “Iye tsie cato, Maija'quē mēsaru yo'o ja'ñere cuañe nēoñere do'i quē'ye neñere iñoñe a'ē.”

21 Jaje caquē Moisés, Maija'quē ca'ni huē'eje tsiepi si'a huē'e sa'cuapi cui'ne Maija'quēre necaijē yo'o co'amañaje si'aye tsiepi ne saohuē.

22 Jaje pa'ina, cuañese'e caji: ti si'aye tsie do'ipi de'ocohua'ire neñe pa'iji. Tsie casoye peoto, co'aye yo'osi do'ire saï toñe peoji.

Cristo Ai Yo'ose'epi Co'aye Yo'ose'e Nejocaji'i

23 Iye yeja ayere ma'tëmo co'amañaje pa'ye nëicohua'ire huaijê isi do'ipi tsoa toñe paji'i. Jaje pa'iquëta'are ma'tëmo pa'ija'cohua'ire cato nëicohua'ire huaijê isiye jerepa pa'yepi tsoa toñe pa'iji.

24 Jaje pa'ina, Cristo, paipi ma'tëmo huë'eje pa'iore nesi huë'ena cacaye paipi. I cato jare ma'tëmore pana cacapi. Yure jarote pa'i mai do'ire secacai pa'iji, i pëca ja'quë ña huë'ña.

25 Maija'quë huë'e ñacai ëjaërepa judío paï cato de'o huë'ñare pana ometëca ñape cacaquë api, i tsie peoyere isisi'i caquë. Jaje pa'iquëta'are Cristo cato si'anëpi ju'i i tsie isiquë pa'iye paï.

26 Jaje yo'oye pa'ito Cristo yeja de'hua maca aquëpi si'anë jucacai patira'pi. Jaje pa'iquëta'are Cristo cato yure tëji mu'seña pa'i maca dani i ju'i do'ipi si'aye co'aye yo'oyere nejocaji'i.

27 Paï ju'iñe je'quë te'erepa ju'iñe pa'iji. Ja jeteyo'je cato iohua'i yo'ose'e ñani ca tëjiyese'e pa'iji.

28 Jaje pa'ye cui'ne Cristoje te'erepa jucacani tëjipi, jai paï co'aye yo'o do'ire nejocasi'i caquë. Tijupë ñai cõ maca cato co'ayere nejocasi'i caquë daiye pasipi, ite utejê pa'icohua'ire huasosi'i caquë daija'quë api.

10

¹ Moisés cuañese'e cato paï to'ouje pa'ye paji'i,

itirepa dai ja'ñe pa'ina. Jaje pa'ina, itirepa peopi, ja do'ire cuañese'e yo'ocohua'ire de'ocohua'ire pare necaiye peopi, ometëca ñape Maija'quëna tsiojaijê nêicohua'ire huaijê isicohua'ire.

² Jaje pa'ina, cuañese'epi de'ocohua'ire tsoa toñe pa'ito Maija'quëre isijê nêicohua'ire huaiye jeora'huë, co'aye peocohua'ire nêina, asajê.

³ Jaje pa'iquëta'are nêicohua'ire huaijê isijê yo'oye cato cocajili, iohua'i co'aye yo'oyere ometëca ñape cuasayere.

⁴ Jaje pa'ina, huequë emëohua'i tsie, cui'ne jo'ya ñama tsie, co'aye yo'oyere nejocaiye tija ma'ñe paji'i.

⁵ Jaje pa'ina, Cristo iye yejana i caca maca capi, Maija'quëre:

Më'ere isinu'u cajê, nêicohua'ire huaijê yo'oye, cui'ne co'amaña më'ere isiyë më'ë cato co-equë ñañë.

Jaje pa'ina, më'ëpi yë'ere capëre isihuë.

⁶ Më'ë cato sihuama'ë pa'iyë, co'aye yo'osi do'ire tsoa toñu'u cajê, nêicohua'ire huani ëojê, cui'ne co'amañare isijê yo'oyere.

⁷ Ja maca ñani cahuë: “Daiyë, yë'ë më'ë yëyeje pa'ye yo'osi'i caquë.

Jaje toyase'e pa'iji, toya pëpëna yë'ë yo'o ja'ñe ayere.”

⁸ Jaje pa'ina, du'ru macarepa caji, Moisés cuañese'ere yo'ojê co'aye yo'o do'ire nejoñu'u cajê nêicohua'ire huani isijê, cui'ne ëojê yo'ojëta'are Maija'quë coequë sihuama'ë ñaji.

⁹ Casiquëpi jeteyo'je acore caji: “Daiyë, yë'ë më'ë yëyeje yo'osi'i caquë.” Jaje cani caji, si'aye ja'në

nëicohua'ire huaijē isijē yo'ose'ere nejoñē caquē. Nejni huajēyere neñē, caquē.

¹⁰ Jaje pa'ina, Jesucristo i capēre ti isi tējiquē, Maija'quē yēyeje pa'ye jucacai do'ipi, mai Maija'quē tsecohua'i de'ohuē.

¹¹ Maija'quē huē'e ñacai ējaohua'i judío pai acohua'i cato si'a mu'señapi isicohua'i a'ē, te'eye pa'yere, si'anē nëicohua'ire huaijē. Jaje yo'ojēta'are ja yo'oye pai co'aye yo'ose'ere nejo ti'añe peoye a'ē.

¹² Jaje pa'iquēta'are Jesucristo cato te'ore pare isi tējipi, i ju'iñepi. Ja jeteyo'je yure cato Maija'quē ēja te'tere ja'rusiquēpi ñu'iji.

¹³ Jarote pa'i uteji, ite sañope yo'ocohua'ire Maija'quēpi i quēo huē'ehuēna tē'ya meni saojaquē caquē.

¹⁴ Te'e i isiyepi Maija'quē tsecohua'ire ti nuñe pa'iohua'ire nepi.

¹⁵ Jaje pa'ina, Maija'quē joyopi jare nuñere pa'ē caquē quēaquē caji, ñeje:

¹⁶ Yē'ēpi ja mu'seña tēto saisi maca paire ñeje yo'ojaquē a'ē, caji, mai Ejaē:

Iohua'i joñoare pana yē'ē cuañeñere ayajaquē a'ē, Cui'ne iohua'i cuasa hue'ñana toyajaquē a'ē, yē'ē cuañeñere.

¹⁷ Cui'ne yequeje caji:

Ti cuasa coñe pajaquē a'ē, iohua'i tayojē co'aye yo'ose'ere.

¹⁸ Jaje pa'ina, yure cato tsoe sai to cuañose'e sēte, co'aye yo'o do'ire sai toñu'u cajē isijē yo'oye peoji.

Maija'quēna Tsiojaiñe Pa'iji

19 Jaje pa'iyē sēte Maija'quē do'ijē yure cato ca'raye peoyerepa Jesús tsie do'ipi Maija'quē huē'ena i pa'i huē'ñare pana cacaye pa'iji.

20 Jesús ju'i do'ipi huajē ma'a, ti pa'i ma'arepa tsoe tēhuose'ere maire hui'yocaisi ma'aja'a saijē ti'añe pa'iji, i pa'i huē'ñare pana.

21 Jaje pa'ina, Jesu api, Maija'quē huē'ere pa'i maire secacai Ējaērepa, Maija'quē huē'e ñacai Ējaē sēte.

22 Jaje pa'ina, nuñe pa'i joñoapi pa'ire paji Maija'quēre cuasacohua'ipi, co'aye cuasaye tsoa tosicohua'ipi, capēje de'o ocore papi tsoa tosicohua'ipi, ja yē'ta'a co'acohua'ire nēiñe peocohua'ipi, ca'rama'pē Maija'quē quē'rona sa tsiojañu'u.

23 Jaje pa'ina, Maija'quēpi i ca nēose'ere isire paja'quē api cuasa do'ire, ti jēa coema'pē ocue pa'i macarepa pañu'u, Maija'quēre pa'ire paji cuasajē mai utejē yo'oyere.

24 Jaje pa'ina, co'eñu'u, paire ai oiyeppi, cui'ne de'o co'amañare neñepi, ai pa'ija'core.

25 Jaje pa'ina, mai Ējaē dai mu'se jerepa ja'yere pa'iyē sēte pai ñape yecohua'ire ca sētoñu'u, de'oye yo'oja'cohua'ire. Jaje pa'ina, si'anē jeoma'pē tsi'siye pañu'u, tsi'sima'cohua'i yo'oyere ye'yema'pē pañu'u.

26 Jaje pa'iquēta'are maipi tsoe nuñerepa pa'iyē asasicohua'ita'a ja yē'ta'a co'ayere yējē yo'ocohua'i pa'ito peoji, yeque mai co'aye yo'o do'ire sai tocaiye.

27 Coa Maija'quēre sañope yo'ocohua'ire nejo huē'ñase'e huajēya'ye pa'iose'e uteye pa'iji, toa

coro mēi hue'ñapi paì ñape yo'ose'e ñani nejo hue'ñapi.

28 Ñajë'ë, Moisés cuañese'ere, sehuoma'ë yo'osiquëre, cayaohua'i, panita'a toasocohua'i i yo'oye ñasicohua'ipi. Sañope cacohua'i pa'ito ti oima'pë jaëte huani jeoñe paji'i.

29 Jaje pa'ito jerepa si'se cuañoja'cohua'i a'ë, ja tsiepi Maija'quë tsecohua'ire necaisicohua'ita'a, Maija'quë mamaquëre meñe tsa'cuje, Maija'quë ca nëose'e tsiere coecaisicohua'i cui'ne Maija'quë joyore iohua'ire oi necai joyore sañope casicohua'i. Ja tsie cato huajëye ca nëose'ere do'i quë'yerepa meñe necaiye a'ë.

30 Maipi asayë, Maija'quë case'e: "Paì yo'ose'e nuñerepa ñaquë ne de'huaye cato yë'ë yo'oye a'ë. Yë'ëpi saisi'i." Cui'ne yequeje capi: "Maija'quë i paire ñaquë iohua'i yo'ose'ejë pa'ye saija'quë api."

31 Ai huajëya'ye pa'ye a'ë, Maija'quë huajëquërepa jëñana tomeñe, jaje pa'iohua'ipi.

32 Mësarujä'a mia hue'ña pa'i coca asasi maca ai yo'oye ai pa'ina, quëco paye pajë quëcose'ere cuasajë'ë.

33 Jaje quëcojëna, mësarü acohua'ire ai co'aye cajë cui'ne co'aye yo'ohuë, si'a paì ña hue'ñana. Jaje yo'ojëna, yecohua'ipi iti co'aye yo'o cuañocohua'ina se tsioni ai yo'oyere pa'ë.

34 Co cuañosicohua'ire mësarupi teaye ñajë cöcaë'ë. Cui'ne mësarü co'amañare peo hue'ña jiotoje sihuajë ñahuë, jeto ma'tëmöre ti carajäima'co'a maña payë, cuasajë quëcojë.

35 Jaje pa'ina, mësarü, Maija'quëpi necaija'quë api cuasajë quëcoyere jeocoma'pë pa'ijë'ë. Ja

cuasase'epi mäsaru ai pa ja'ñe ti'aja'cohua'i a'ë.

³⁶ Jaje pa'ina, quëcojè pa'ijè'ë, Maija'quë yëyere yo'oñu'u cajë. Jaje yo'ojè mäsaru i si'aye i ca nëose'ere paja'cohua'i a'ë.

³⁷ Jaje pa'ina, toyase'e caji:

Esä, ai esa daija'quë api,

Iti daija'quëre casiquëpi, ai tsoe nëima'ë pasipi.

³⁸ Yë'ë tsequë nuñe pa'i cato Maija'quë pa'ire paji cuasa do'ipi pa'ija'quë api,

Jaje pa'iquëta'are sihuama'ë pa'iyë, ja'në pa'ise'ena co'iquëre cato.

³⁹ Jaje pa'iquëta'are mai cato ja'në pa'ise'ena co'ijë nejo cuañocohua'i acohua'i peoyë. Mai cato Maija'quë pa'iji cuasa do'ipi joyo pa'iyena ti'acohua'i acohua'i a'ë.

11

Pa'ire Paji Cuasaye

¹ Pa'ire paji cuasaye cato mai uteyere paja'cohua'i a'ë cuasajë pa'iyë a'ë, cui'ne mai ña ma'ñere tsoe ñase'eje pa'ye cuasajë pa'iyë a'ë, ti jëa coema'pë.

² Jaje pa'ina, mai aiohua'i tsoe pa'isicohua'i jaje cuasa do'ipi de'ocohua'irepa ca cuañohuë.

³ Jaje pa'ina, mai pa'ire paji cuasacohua'ipi si'a co'amaña mai ñañe peose'ere Maija'quëpi i yë'ose'epi de'huapi, cuasayë.

⁴ Pa'ire paji cuasa do'ipi Abel ai de'oyere Maija'quëre isipi, Caín isiye jerepa pa'yere. Jaje pa'ina, Maija'quëpi ite nuñe yo'oquëre caquë i isiyere sihuacaji'i. Jaje pa'ina, tsoe ju'isiquëta'a Abel ja yë'ta'a pa'ire paji cuasayeja'a caji.

⁵ Pa'ire paji, cuasa do'ire Enocre ma'tëmona Maija'quëpi ju'ima'quëre huajëquëre sa'aji'i. Saëna, paipi ite co'e juja'ahuë'ë. Jaje pa'ina, toyase'e caji, Enoc ja yë'ta'a ma'tëmona sa cuañoma'në Maija'quë yëyere yo'oquë pa'aji'i.

⁶ Jaje pa'ina, pa'ire paji cuasaye peocohua'i, Maija'quë yëye yo'o tì'añe peoji. Pa'ire paji cuasaye a'ë Maija'quëna tsiojañe. Cui'ne, Maija'quëpi ite co'ecohua'ire jaiye de'oyere pare isi ja'ñere tì'añe.

⁷ Maija'quëpi ti ña ma'ñepi pa'ija'coa, yequë mu'se caquë quëaëna. Pa'ire paji cuasa do'ire Noé de'oye sehuoni jai yohuë de'huapi, i tsëcapëre huasoja'core. Jaje pa'ina, Noé pa'ire paji cuasasi do'ipi huaso cuañopi, iye yeja paise'e ne huesëjëna.

⁸ Pa'ire paji cuasa do'ire Abraham Maija'quë soiye de'oye sehuoni i yeja jëoni, Maija'quë soi huë'ñana saji'i, ite isija yejana. Jarona saiye, cuasama'ë huesërepa sa'aji'i.

⁹ Sani pa'ire paji cuasa do'ipi Maija'quë isisi'i ca nëosi yejare tije pa'ipi ca'nipi nesi huë'ñare pa'aji'i. Pa'isiquëni cui'ne Isaacje cui'ne Jacobje ca'ni huë'ñare pa'ahuë'ë, i isisi'i ca nëose'e pacohua'ipi.

¹⁰ Jaje pa'ina, Abraham Maija'quëpi cuëcueni jëacore pare nesi daripëre utequë pa'aji'i.

¹¹ Pa'ire paji, cuasa do'ire Zara aiopi cui'ne caraopi tutu isi cuañoni mamaquëre çao, iote isisi'i ca nëosiquëni, care papi caco sehudo'ire.

¹² Jaje pa'ina, Abraham pani tëji mu'sëñapi i acohua'ire jai paire papi quëna huë ma'ñocoja'i pa'ire pare cui'ne jai tsiaya tëtëpa mejahuëje pa'yere pare, cuëcue saoye peoyerepa.

13 Si'aohua'i jaohua'i cato Maija'quë ca nëose'le pama'pë jujua'huë'ë. Jaje pa'iquëta'are pa'ire paji cuasacohua'i sëte so'opi se ñajë, pa'i ja'ñere sihua'ahuë'ë. Jaje pa'ina, iye yejare tìohua'ipi coa pa'iyë, cuasa'ahuë'ë.

14 Jaje cacohua'i cato tiñarepa quëayë, ja yë'ta'a yequë yejare ìohua'i paja yejare co'ejë cu'iyë cajë.

15 Jaje pa'ina, ìohua'i daisi yejare cuasajë cacohua'i pani tsoe co'ira'huë, ìohua'i daisi yejana.

16 Jaje pa'iquëta'are ìohua'i cato ai de'o yejare pare yëhuë, ma'tëmo yejare. Jaje pa'ina, tsoe de'huacaisiconi de'o daripë, ìohua'i pa'ija'to paye sëte Maija'quë huajëya' coema'ë pa'iji, ìohua'i pëca ja'quëre hue'yoto.

17 Pa'ire paji cuasa do'ire Abraham Maija'quëpi neñasi'i caquë caëna, i ca nëosi mamaquëni huani ëoquë isiquë sesi'i caquë yo'opi. I mamaquë tel'i macani isire pasi'i caquë yo'opi,

18 Maija'quëpi Isaac do'ija'a jai paire më'ë acohua'ire paja'quë a'ë ca nëosiquëta'are.

19 Jaje pa'ina, Abraham cato coa huesë yo'oye papi. Asaquë yo'opi, Maija'quëpi ju'isicohua'ire huëoquë pa'iyere. Jaje pa'ina, ju'isiquëje pa'ini mamaquëre huajëquëre pa copì.

20 Pa'ire paji cuasa do'ipi Isaac, yequë mu'se Jacob cui'ne Esau de'oye pa'i ja'ñere caca'aji'i.

21 Pa'ire paji cuasa do'ipi Jacob José mamajëre, pai ñapere ìohua'i de'oye pa'i ja'ñere caca'aji'i, i ju'iñe ti'asi maca. Cui'ne i doquë cu'i tupëna jëaye tota paquë nëcaquë Maija'quëre de'oquëre pa'ni caquë sihua'aji'i.

22 Pa'ire paji cuasa do'ipi José i ju'i maca Israel

mamajëpi Egíptopi yequë mu'se etani saija'cohua'i a'ë capi. Caquë ì tara jaje yo'ojë'ë caquë cuañepi.

23 Pa'ire paji cuasa do'ire Egípto pai ëjaëpi tsire huani jeoñe pa'iji cuañese'e pa'itoje, ca'rama'pë tsihua'ëre de'oquë macani ñani oijë Moisésre ja'a coasiquëni pëca ja'quëohua'i toaso ñañëohua'ire yahueni pahuë.

24 Pa'ire paji cuasa do'ipi Moisés posë de'osi maca coepi, Egípto ëjaë mamaco, mamaquë hue'yo cuañoñe.

25 Coa ai jerepa Maija'quë pai ja're co'aye yo'o cuañoñere yëpi, co'ayere yo'oquë nëhui tëcahuë maca sihuaye pa'iyere coequë.

26 Jaje pa'ina, cuasapi, ai jerepa de'oji, Cristo do'ire Maija'quë tsecohua'i ja're ai yo'oyepi. Jaje pa'ina, Egípto de'o co'amañare do'i peoye ñapi, Maija'quë ite isija'a co'amañare jerepa pa'ye cuasaquë.

27 Pa'ire paji cuasa do'ipi Moisés Egípto pai ëjaë ite pëiñe ca'rama'ë Egíptopi etani sani, Maija'quëre ñañeje pa'yerepa ì yëyere cuasaquë ocue pa'i macarepa paji'i.

28 Pa'ire paji cuasa do'ipi Moisés Egípto eta huajë mu'se tì'acquëna, sihuaquë cuañepi, eta sa'noana tsiepi tsoajë'ë caquë. Jaje tsoarena, huani jeo huiñaëpi te'ireje Israel pai du'ru mamaquëre pare huaiye paja'quëre capi.

29 Pa'ire paji cuasa do'ipi Israel paije jai Maja'iña yeja jajucore saiyeje pa'ye jeë'ë, yequë je te'tena, ñani cui'ne Egípto paije jeñu'u cajë yo'ojë dutu jujua'huë'ë.

30 Pa'ire paji cuasa do'ipi Israel pai siete mu'seña Jericó daripë tëhuopa yërëhueja'a tël'ija'ahuë'ë.

Tē'ijaisi maca tēhuopapi jē'ye darēa'co'ë.

³¹ Pa'ire paji cuasa do'ipi Rahab co'a nomioje Maija'quē pai a'ë cuasama'cohua'i ju'ijēna, te'e ju'iñe paō, Israel paire, yahue peocohua'ire de'oye ñacaisi do'ire.

³² ¿Iquere yeque caja'quē a'ni? Jaje pa'ina, yē'ēpi, Gedeón, Barac, Sanson, Jefte, David, Samuel, cui'ne Maija'quēre quēacohua'i yo'ose'ere quēaquē pa'ito mu'sepi caraja'co pa'ini.

³³ Pa'ire paji cuasa do'ipi yecohua'i yejaña siohuē, nuñerepa de'oye cuañecohua'i de'ohuē, Maija'quē ca nēose'ere isi cuañohuē, jai emu yaiohua'i yē'opojaje si'ñe saohuē.

³⁴ Jai toana u huesēyere yayohuē, hua'tipi huani jeōñu'u cajē yo'ojēna, catihuē. Sēyē huesēsicohua'ipi tutu isi cuañoni tutu hue'ejē, yequē yejaña soldado paire iohua'ire sañope yo'ocohua'ire uihua quēco saohuē.

³⁵ Pa'ë, cui'ne nomiohua'ije cajeohua'i ju'isicohua'ipi cui'naohua'ipi huētena pasicohua'ije. Yecohua'ipi ai de'oye pa'iyena juni huēni pa'iyere cajē joye huaso cuañoñe coejē ju'ë'ë, huaijēna, ai yo'ojē.

³⁶ Yecohua'ipi ai yo'ohuē, co'acohua'i a'ë cajēna, si'sejēna, quēna meapi sējēna, cui'ne co hue'ñana cojēna.

³⁷ Yecohua'ipi, quēna pēapi jea huea cuañohuē, yecohua'ipi jopore paja'a yēto tēa cuañojē, panita'a hua'tipi tē'ca tētejēna ju'ë'ë. Yecohua'ipi cabra cui'ne yēi ñama ca'nire ju'ijē si'a hue'ña coa cuniroja'ë'ë, co'amaña peocohua'ipi, ai co'a ju'ijē oicohua'ipi yecohua'ipi josa yo'ojēna, pa'ë'ë.

³⁸ Airepa de'o paini, si'aohua'i iye yeja paipi

de'oye yo'oyere carasicohua'ipi coejëna, iohua'i sani pëaja'to peocohua'ipi yeja coñare, cuene yejañare cui'ne ainoare panirojaë'ë.

³⁹⁻⁴⁰ Maija'quë ña hue'ñana pa'ire paji cuasajë de'oye ite yo'o iñosicohua'ita'a i ca nëose'e isi cuañoñe pahuë, Maija'quëpi yequë mu'seña de'oyerepa necaquëna, mai ja're tsioni nuñe pa'icohua'irepa pa'ijajë caquë ña nëosi do'ire.

12

Jesuse'ere Ñajë Tuñu'u

¹ I Maija'quë pa'iji cuasajë yo'o iñosicohua'ipi maire tël'ijatena pa'iyë sëte jëocoñu'u, si'ayë maire dëquëye josa yo'oyere cui'ne co'ayepi maire hueñere. Jëoconi jeto ñese sai hue'ñase'e se ñajë huë'huëñu'u.

² Jajë pa'ina, maire de'ocohua'ire nequëna, Maija'quë pa'iji cuasayë isiquëna, Jesuse'ere ñajë tuñu'u. Co'acohua'ise'e soquë sarahuana que cuañojë ju'icona, huajëya'ye pai ñajëna, ai yo'oquë ju'i ma'ñe caye papi, ai yo'osi jeteyo'je ai sihuaja'quë cuasa do'ire. Jajë pa'ina, Maija'quë ëja tē'tena ja'rupi.

³ Jajë pa'ina, co'acohua'ipi ite co'ayë yo'ojëna, si'ayë quëcosiquëre pani Jesuni cuasajë tuijë'ë, yo'o jujani jëoñe paja'cohua'i.

⁴ Ja yē'ta'a mësarü tī'añe pañë, co'ayere yo'oma'pë pañu'u cajë si'anë sañope yo'ojë ju'iñena.

⁵ ¿Mësarü tsoe huañëyete, Maija'quë mësarute i mamajëre sëte yëhuoquë cayere? Ñeje toyase'e caji:

Yë'ë mamaquë coema'ë pa'ijë'ë, më'ë tayoyere nu'ñequë si'seto.

Yëhuoquë yo'oto yo'o jujahuë cama'ë pa'ijë'ë.

⁶ I oicohua'ini Ëjaë cato tayoto nu'ñequë api.

Cui'ne i mamajë de'osicohua'ini Ëjaë cato si'sequë api.

⁷ Maija'quëpi mësarute mamajëre yo'oyepi yo'oji. Jaje pa'ina, quëcojë'ë, i si'seye. ¿Ique mamaquëpi pëca ja'quëre nu'ñe cuañoma'quë pa'iquë'ni?

⁸ Jaje pa'iquëta'are, Maija'quëpi mësarute si'aohua'ire i mamajëre si'seyeje pa'ye si'sema'ë pa'ito mësarui mamajërepa peoyë, yecohua'i a'ë.

⁹ Cui'ne mai tsi pa'inë, mai tayoyere nu'ñejë, mai iye yeja ja'quëohua'ipi si'sejë pa'ahuë'ë. Yo'ojëna, maipi iohua'ire ëjaohua'ire ñajë ca'rajë de'oye yo'ohuë. ¿Jaje me yo'ojë ai jerepa Maija'quëre ma'tëmo aquëre pare de'oye sehuocaijë yo'o ma'ñeni ti pa'iyere pañu'u cajë?

¹⁰ Iye yeja ja'quëohua'i cato iye yeja nëhui tëcahuë pa'iyere cajë nu'ñejë si'sehuë, iohua'i yëyeje pa'iohua'i pa'ijajë cajë. Jaje pa'iquëta'are Maija'quë cato mai de'oye ti pa'iyere caquë si'seji, ije pa'iohua'ire nesi'i caquë.

¹¹ Si'aye ja'a si'se cuaño maca cato a'siyese'e pa'iji. Pa'ina, de'oye paji cajë coeyë. Jaje pa'iquëta'are jeteyo'je jo'cua de'oye pa'iyere, cui'ne nuñerepa pa'iyere isiji, tayosi do'ire si'sese'epi.

Maija'quë Yë'ore Asaye Coejë Pa'i Do'ire

¹² De'oji yure jaje pa'iyë sëte huajë tuture papi mësarui jëñare jë'jose'ere mëñe mëajë'ë, cui'ne mësarui nëca sicu tutu peoyere pi'najë'ë.

13 Yo'oni yureta'a nui ma'are pare co'ejë'ë. Co'eni saijë'ë, ja maca do'pë nēcayopi ja'juja'coa. Ja'juni tĭjupë soto coñe paja'coa.

14 Maija'quëna isisicohua'ire papi jai pai ja're jo'cua de'oye pa'iyere cajë yo'ojë'ë. Jaje ina isima'cohua'i pani ti te'ije Maija'quëre ñañe peoji.

15 De'hua ñajë'ë, mësaru aquëpi, sëje oi joyo hue'equëpi josa yo'oquë jai paire co'a de'huaye peoja'core. Jaje pa'ina, Maija'quë de'oye ñacai isiyere si'aohua'i pañu'u cajë de'oye yo'ojë pa'ijë'ë.

16 Mësaru acohua'ipi yequë nomiore panita'a yequë ëmëre yo'oma'pë pa'ijajë, panita'a Maija'quë tsere coema'pë pa'ijajë, Esau je'quë hua'i de'hua maca do'ina si'aye maja'yërepa pa'iyë peoquë tomeaji'i.

17 Ja maca Esaupi pëca ja'quëre de'oye pa'i ja'ñere cacaijë'ë caquë seina, cacaiye pa'aji'i, otarepa oi catoje, mësarupi tsoe iye toyase're asacohua'i a'ë.

18 Mësaru cato Sinaí cutihuëje pa'iona, tsiojajima'pë paë'ë, Israel pai tsiojaijë pa'ise'eje pa'yena, toa tsëni nēcasicona, nea hue'ñana ñamije pa'yena, tutu ai juta hue'ñana. Cui'ne

19 asama'pë paë'ë, duruhuë juiye pisiyeje, cui'ne Maija'quë yë'oje asama'pë paë'ë. Ja yë'o caye asacohua'i cato i cuañëñere quëco tĭ'ama'pë

20 ai jerepa caye pajë'ë, ca'ahuë'ë, ite. I caye cato paji'i: “Ai cutihuëna tsa'cuquëre cato quëna pëapi jea huea'ne paji'i, panita'a uiyopi seso etojai'ne paji'i, nēcicohua'ireje huaiye paji'i, jaro tsa'cucohua'ire,” capi.

21 Jaje pa'ina, Moisésje ja ai huajëya'ye pa'iyere ñaquë quëquëquë capi: “Ai ca'raquë tsasiyë, yë'ëje.”

22 Jaje pa'iquëta'are mësaru cato Sión ai cutihuëna tsiosicohua'ipi pa'iyë, Maija'quë huajëquërepa, pa'i daripëna, ma'tëmo Jerusalénna, cui'ne Maija'quëre sihuañu'u cajë jai pai huiñaohua'i tsi'si sitona,

23 Maija'quë mamajëpi iohua'i mamire ma'tëmona toya cuañosicohua'i tsi'si sitona, tsiojaë'ë. Mësaru cato tsiojaë'ë, si'aohua'ire iohua'i yo'ose'eje pa'ye ti ca de'huaquë Diosu quë'rona. Pai joñoare Maija'quëpi nuñerepa pa'icohua'ire nesicohua'i quë'rona tsiojaë'ë,

24 huajë ca nëose'e cayere necaisiquë Jesuna cui'ne maire tsoa tsi tsie quë'rona tsiosicohua'ipi pa'iyë, Abel tsie seña maca de'oye maire necaiyena.

25 Jaje pa'ina, coema'pë Maija'quë caye de'oyerepa asañu'u, Maija'quë iye yejapi soiquë caquëna, asacaiye coesicohua'i jëaye pa'ahuë'ë. Jaje pa'ina, ai jerepa jëa ti'añe peoji, Maija'quë ma'tëmore papi soiquëna, asacaiye coejë yequere asarojaicohua'i.

26 Ja mu'seña Maija'quëpi caquëna, yeja ñu'cuea'co'ë. Jaje pa'iquëta'are yure cato caji: "Tijupë iye yeja cui'ne ma'tëmoje ñu'cue coja'coa, yë'ëpi yo'oquëna."

27 Jaje tijupë cani caji, si'aye i de'huase'e ñu'cueye pa'iji caquë, a'jiñe nejoñese'e nejoñe pa'iji, jëayere pase'e nëaja'core.

28 Maija'quë cuañe te'te maire isiye cato ti nejo ma'ñe a'ë, ja isi do'ire Maija'quëre de'oji cajë pëpayë ca'rajë, ëjaëre pare ñajë, de'oyerepa ite necañu'u.

29 Maija'quë cato peo hue'ñarepa ëo huesoquë api, toajë pa'i api.

13

¿Me Diusu Yëye Yo'ocaiye Pa'iquë'ni?

¹ Maija'quë do'ijë sëte jeoma'pë si'anë sa'ñe oijë pa'ijë'ë.

² Cui'ne mësarü huë'ena daicohua'ire oijë de'oye necaiye huãnyema'pë pa'ijë'ë. Jajë yo'ojë yeco-hua'i je'quë huiñaohua'i a'ë cuasama'pë huesërepa de'oye ïohua'i huë'ena necaijë pëpa'ahuë'ë.

³ Cuasacaijë'ë, co cuañosicohua'ire, mësarupi ïohua'i ja're co sitore pa'iyëjë pa'ye. Mësarujë cui'ne yo'o cuaño'ñe pa'ïohua'i sëte cuasacaijë'ë, co'aye yo'o cuañojë ai yo'ocohua'ire.

⁴ Si'aohua'i huejani pa'iyere ëjarepa ñajë pa'ijë'ë. Jajë pa'ina, huejasicohua'i nëjo ja're cui'ne ëjë ja're yo'ojë pa'ijë'ë. Jajë pa'ima'cohua'ire Maija'quëpi ïohua'i yo'ose'ere saija'quë api, huejama'cohua'ipi nomiohua'ire yo'orojaicohua'ire, cui'ne nëjore pajëta'a yequë nomiore yo'ocohua'ire.

⁵ Oima'pë pa'ijë'ë, curiquëre. Mësarü payere si-huajë pa'ijë'ë. Jajë pa'ina, Maija'quëpi caji, maire: "Te'ohua'ire jëo nëcoye paja'quë a'ë, cui'ne jëoco huesoyejë paja'quë a'ë."

⁶ Jajë pa'ina, Maija'quëna quëco pajë caye pa'iji, ñeje:

Ëjaëpi yë'ëre cõcaiquëre pa'ë.

Jajë pa'ina, ti ca'raye pañë, paipi yë'ëre co'aye neñu'u cajë yo'oye pa'itojë.

7 Cuasajë'ë, Maija'quë coca quëajë mësarute sasicohua'i pa'ise'ere, me jaohua'i pate'ni cajë. Ñajë ye'yejë iohua'i pa'ise'ere tuijë'ë, pa'ire paji cuasajë yo'ose'ere.

8 Jesucristo cato ipi ñamina'a pa'isiquëpi iye mu'seje pa'iji, jare ti pani huesëji, jë'nëna.

9 Ao aijë ñeje yo'ojë'ë, cajë cuañese'ere si'aye yo'o ti'ajë aicohua'ire ja yo'oyepi ti coçaiye paji. Jaje pa'iquëta'are maire cato ai coçaiji, Maija'quë maire oiyepi, mai joyona tutu isiquëna pa'iyepi. Jaje pa'ina, sehuosicohua'i ja'në ye'yese'ere jeoni tiñe ye'yayena ye'yema'pë pa'ijë'ë.

10 Mai cato payë, tiñe pa'yere Maija'quëna isise'e. Ja cato iye yeja Maija'quë huë'e ñacaicohua'i aiñe peoye a'ë.

11 Maija'quë huë'e ñacai ëjaërepa cato pai co'aye yo'o do'ire sai to ja'ñere isisi'i caquë tsiere de'o hue'ñarepa hue'yo sitona saquë api. Jaje pa'iquëta'are nëicohua'i ca cato pai daripë hue'sena etoni peo hue'ñarepa ëo jeoñe paji'i.

12 Jaje cui'ne Jesuje i tsie do'ipi i paire nesi'i caquë pai daripë hue'sena ai yo'oquë juji'i.

13 Jaje pa'ina, jënajë'ë, Jesús ja're pai daripë hue'sena etañu'u. Etani ai yo'oñu'u, i tea juni cuañoquë ai yo'ose'eje pa'ye.

14 Iye yeja mai peoyë, ti pani huesë daripërepa. Jaje pa'ina, yequë mu'se pa'ija'a daripëre co'ejë saiye.

15 Jesucristo do'ija'a Maija'quëre de'oquëre pa'ni cajë sihuaye pa'iji, si'anëpi. Ite jaje cajë sihuaye a'ë, coa isijë yo'oyeje pa'ye. iJaje pa'iye sëte

mai yè'opopi de'oquère pa'ni Maija'quë cajë si-huañu'u!

¹⁶ Huanëyema'pë pa'ijë'ë, mësarute co'amañapi peocohua'ire cöcaiyere. Ja'ë, Maija'quère isijë yo'oye. Jare Maija'quë sihuaquë necaiquë api.

¹⁷ Maija'quë coca mësarute quëacohua'i cuañeñere de'oye sehuocaijë pa'ijë'ë. Jaohua'i a'ë, mësarute joña ñacaijë pa'icohua'i, Maija'quëna johua'i yo'ose'e quëaja'cohua'i sëte. Jaje pa'ina, mësarupi de'oye sehuocaito sihuajë neja'cohua'i a'ë. Johua'ipi co'aji cajë oijë neto mësarute johua'i necaiye ti cöcaiyere peosipi.

¹⁸ Si'aye nuñerepa yo'oñu'u cajë yo'osicohua'i sëte, tayose'e peoquëna, asajë jo'cua de'oye pa'iyë, nuñerepa yo'ohuë cuasajë. Jaje pa'ina, yëquère secacaijë'ë, cayë, mësarute.

¹⁹ Maija'quëpi jëjo saokuëna, esa yë'ë sani mësarute ja're cöni pa'ija'ñere cajë. Secacaijë'ë, cayë.

De'oye Pa'i Ja'ñere Caquë Pëpa Tëjiye

²⁰ Jo'cua de'oye pa'iyë isi Diusupi yëi ñama Ejaëre pare, ju'isiquëni huëosiquëpi, mësarute ti ca nëo huesose'e necai tsie do'ipi,

²¹ nuñe pa'icohua'ire, si'aye i yëyere yo'oja'cohua'ire nejaquë. Jaje yo'oquë Jesucristo do'ipi maire i sihuaquë ñañere yo'ojaquë. De'oquère pa'ni cajë si'anëpi ise'ere sihuajë pañu'u. Jaje pa'ijaquë.

²² Maija'quë do'ijë, yë'ë mësarute yëhuoquë case'ere quëcojë de'oye asacaijë'ë. Nuñerepa cayë cato yë'ë mësarute toyasico nëhuicoa.

²³ Asajë'ë, cui'ne Maija'quë do'iquë Timoteo tsoe eta huajëpi, cosiquë pa'isiquë. Ipi yë'ë quë'rona

t̄itasiquē pa'ito i ja're con̄i sasi'i, mēsarute do'i sai maca.

²⁴ Si'aohua'ire, Maija'quē paire cui'ne mēsarute Maija'quē coca quēajē ñacaicohua'ireje pēpacajē'ē.

²⁵ Italia yejapi daicohua'ije, mēsarute pēpa saoyē. Maija'quē oi ñacaiyepi si'aohua'ire mēsarute pa'ijaquē. Jaje pa'ijaquē.

Maija'quë Huajë Ca Nëose'e
New Testament in Secoya (EC:sey:Secoya)

copyright © 2012 Wycliffe Bible Translators, Inc.

Language: Secoya

Translation by: Wycliffe Bible Translators, Inc.

Secoya [sey], Ecuador

Copyright Information

© 2012, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Secoya

© 2012, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-30

PDF generated using Haiola and XeLaTeX on 18 Apr 2025 from source files
dated 29 Jan 2022

995e68c5-fe57-54e6-bf8e-0637526d3f7d